

Se mak Manan no Implikasaun hosi Konstelasaun Politiku agora

Author: Guteriano Neves, 9 November 2017

Ita nia eleisaun Parlamentar foin dadaun ne'e, sai nuudar eleisaun ida ne'ebe hakmatek liu no organizadu liu dezde ita restaura ita nia independensia iha 2002. Infelizmente, prosesu politiku ne'ebe kontinua ho incerseteza boot ida ne'e refleta buat lubui ida. Ida mak refleta fragilidade iha ita nia institutisaun politiku no forsa sosial ne'ebe existe, no ida seluk mak refleta fallansu hosi ita nia elite politiku sira iha Partidu Politiku sira atu jere sira nia interese rasik. No situasaun ida ne'e klaru katak benefisiu ema balu ou atu dehan karik, joga ida ne'e ema balu mak sei manan no ema balu lakon; depende ba perspetiva. Maibe nia impaktu ba tempu naruk sei kontinua atu afeita ita nia lalaok politika no siklu politika rai laran nian. Hau nia reflesaun ida ne'e koko haree asuntu sira iha leten, hosi perspetiva hau nian, nuudar sidadaun babain ida.

Inserteza politika ida ne'e kria paniku ba sosiedade. Kondisaun paniku ida ne'e existe mos tanba realdiade ita nuudar sosiedade ida ne'ebe moris liu hosi siklu violensia lubuk ida iha ita nia istoria. Inserteza ida ne'e mos lori ita atu fo kulpa ba malu kona ba se los mak iha inserteza ida ne'e nia kotuk, no se los mak tenki toma responsabilidade atu hakotu. Hanesan sosiedade ne'ebe moris liu hosi istoria kolonializmu, okupasaun militar, no intervensaun hosi autor external oioin, dala barak ita buka atu fo kulpa ba ema seluk, hanesan nasaun vizinhu sira. Iha parte seluk, ita rasik mos bazeia ba ida ida nia afiliasaun no preferensia politika, fo kulpa ba malu, ataka malu, no duun malu. Balu fali komesa analiza haree hosi kontektu Guerra Fria nian, ou haree ne'e hanesan funu entre Esquerda ho Direita, entre forsa Progressiva ho Status Quo, etc.

Ba hau, simplizmente, inserteza ida ne'e refleta buat rua. Ida Inserteza ida ne'e hatudu mai ita kona fragilidade iha ita nia institutisaun politiku. Instituiusan politiku iha ne'e la'os refere ba organizasaun, maibe refere ba 'Rules of the Game' ne'ebe existe atu regula kona ba distribuisaun poder politiku iha sosiedade laran. Ida ne'e ita bele nota wainhira mosu interpretasaun oioin kona ba konstituisaun, praktika sira ne'ebe liu ona refere ba formasaun Governu iha 2007, no prinsipi demokratiku ne'ebe existe iha ita nia rain. Ida ne'e hatudu katak ita nia konstituisaun rasik loke hela lakuna ida ne'e.

Kestaun seluk mak inserteza ida ne'e refleta fallansu hosi ita nia elite politiku sira iha Partidu laran atu jere sira nia interese. Partidu hotu hotu existe tanba sira nia interese no hakarak hetan poder. Ida ne'e laos asuntu ida ne'ebe ita presiza diskuti. Kestaun lolos mak oinsa atu hetan poder,, no dalan saida mak lejitimu liu atu hetan poder. Partidu hotu hotu iha sira nia interese no interese ne'e dala barak interese elite sira nian mak domina. Ita la bele Na'if no tolan tomak deit konseitu sira hanesan "interese nasional" ka "estadista" ou "interese estadau." Ita tenki haree klean oinsa konseitu sira ne'e aplika iha nivel politika (Kebijakan/Policy) no oinsa interese elite politiku sira nian subar iha konseitu sira ne'e. Ne'e laos buat foun ida iha politiku.

Iha sosiedade ne'ebe kontinua sai kompleksu, negosiasaun politiku nuudar dalan ida ne'ebe normalmente uza atu lori hetan konvergencia interese entre elite sira nian. Wainhira mosu negosiasaun ne'e tanba iha divergencia interese. Entaun negosiasaun buka atu hetan konvergencia interese. Agora saida mak ita haree obviamente mak ne'e. Ita nia elite sira falla atu

jere sira nia interese. Tanba ne'e mak sira falla atu harii koligasaun entre sira. No fallansu iha negosiasaun ne'e buat ne'ebe normal iha vida politiku.

Maibe, se ita haree kle'an liu, entre autor sira ne'ebe hola papel determinante iha prosesu ida ne'e, sira nia interese la hanesan no kompleksu. Iha Fretilin rasik, ita hatene katak maski Fretilin manan iha eleisaun 2007, sira la forma governu. Iha eleisaun tinan ida ne'e, Fretilin manan maski ho maioria simples. Sei sai dezafiu boot ba lideransa Fretilin nian se agora nia falla tan atu forma Governu. Ida ne'e sei hamosu pergunta boot ida hosi militantes no votantes Fretilin nian ba lideransa. Entaun tuir hau nia pontu de vista, lideransa Fretilin rasik hasoru hela funu rua. Ida iha laran mak oinsa atu mantein konfiansa militantes; no ida seluk mak oinsa atu forma governu. No funu rua ne'e so bele manan ho dalan ida deit: Forma Governu. Wainhira konsege forma governu, impaktu ida mak mantein konfiansa militantes, no ida seluk mak bele aplika politika ne'ebe Fretilin rasik iha ona kona ba dezvoltamentu. Dinamiku sira hanesan ne'e normal iha organizasaun ne'ebe deit. Pontu importante katak iha lideransa Fretilin enfrenta dezafiu ida ne'e, no ne'e hanesan forma responsabilidade ida.

Problema ne'ebe Fretilin enfrenta mak wainhira tama ona iha negosiasaun. Se ita nota hosi komunikasaun politiku ne'ebe sai hosi lideransa Fretilin depois de hatene ona kona ba rezultadu eleisaun, Fretilin nia preferensia primeiru mak atu koliga ho Xanana Gusmao – la klaru se ho CNRT. No ho asumsaun katak se Prezidenti hatan ona, Partidu sei halo tuir. Preferensia sira seluk mosu depois de preferensia ida ne'e falla ona.

Wainhira falla ona atu atu aseguira maioria iha Parlamentu, simplizmente tanba KHUNTO ne'ebe sai dada-an hosi koligasaun iha minutu ikus, Fretilin ikus mai lanxa mak kampanhe opiniaun publiku liu hosi Media Sosial. No iha kontektu ida hanesan ne'e, Fretilin kaer mak "interese nasional" ou "interese estadu." Katak programa Fretilin nian mak reprezenta interese povu nian.

Problema mak ne'e. Konseitu sira ne'e maski bele hetan apreiasaun, maibe konseitu mamuk ida, no bele mosu interpretasaun oioin. Entaun susar atu julga partidu ida katak nia laiha sensibilidade ba "interese nasional" ka "interese estadu" wainhira nia la vota a favor ba programa. Iha tempu hanesan, Partidu hotu hotu ba halo kampanhe ho liafuan hanesan katak atu halo programa ne'ebe "pro povu" no "Pro-kiak." No koalia hosi kontektu politika publiku, konseitu sira hanesan "pro-povu" no "pro-kiak" iha ninia fundamentu filozofiku no politika publiku rasik. Ida ne'e sei implika ba estrutura orsamentu, estrutura programa, no ate estrutura governu rasik. Entaun atu hateten lolos, maski iha nivel komunikasaun politiku, iha argumentu ne'ebe mosu katak programa ne'e pro-povu no pro-kiak, razaun ne'e validu ka lae, sei presiza diskuti no haree didiak konteudu hosi programa ne'e, no implikasaun ba distribuisaun rekursu rasik.

Ita hatene katak wainhira falla ona, PLP ho CNRT rasik iha deklarasaun politika, dehan atu halo opozisaun konstrutivu bazeia ba interese nasional. Maibe iha kontektu politiku, komunikasaun sira hanesan ne'e mos loke hela lakuna boot ida tanba interese nasional tuir CNRT no PLP nia perspetiva la hanesan ho saida mak Fretilin hanoin. Entaun susar atu julga partidu sira nia votasaun bazeia los deit ba konseitu mamuk sira ne'e.

PLP nuudar forsa ida ne'ebe hetan atensaun barak iha konstelasaun politiku ida agora, simu kulpa barak, tanba PLP mosu iha kontektu uniku ida. PLP iha eleisaun ida ne'e konsege kapitaliza votantes nia disatisfasaun ba ukun tinan sanulu nian. Entaun iha espetativa hosi

vontantes hirak balu ne'ebe vota ba PLP katak PLP sei sai forsa alternativa atu fo tradisaun foun ida ba politika iha Timor. Ida ne'e mos haforsa liu tan ho pozisaun Prezidenti TMR nian iha tempu ne'eba ne'ebe foti pozisaun atu kontra programa Governu nian, no sai hanesan forsa politika aternativa wainhira laiha opozisaun iha Parlamentu rasik. PLP nia kampanhe ida ne'ebe fo emfaze ba nesiedade baziku doque ba projeitu boot sira klaru katak konsege duni atrai votantes sira lori asegura kadeira ualu iha Parlamentu. Haree hosi distribuisaun votus, bele dehan katak la'os Fretilin mak halo CNRT nia votus monu, maibe PLP mak hadau tia votus CNRT nian tanba ema nia disatisfasaun ne'ebe mosu durante CNRT nia ukun. Maibe desizaun PLP nian lori ba hamutuk ho CNRT bele hamosu mos risku ba PLP rasik iha longu prazi, se asumsaun iha leten los.

Iha tempu hanesan, sentimentu disatisfasaun ba PLP, inklui hosi votantes PLP balu mos bele nota, liliu iha debate programa. Razaun fundamenta ba PLP, KHUNTO no CNRT uza mak ne'e; governu la estavel tanba laiha maioria iha Parlamentar. Razaun ida ne'e validu, wainhira ita haree katak Governu kada tinan tenki halo hela deit esforsu oioin atu konvense Partidu Opozisaun sira atu vota a favor ba orsamentu. Ida ne'e sei reduz tia Governu nia esforsu ba asuntu seluk. Simplizmente atu hateten katak Governu minoria la estavel duni no nafatin kontinua ho inserteza.

Problema mak ne'e. Iha sosiedade ida agora ho nivel disatisfasaun as, razaun bazeia ba numeru deit la konvensidu. Ema presiza razaun liu tan. Klaru katak ida ne'e los wainhira iha votasaun iha Parlamentu. Maibe ba longu prazu, razaun simples hanesan ne'e bele iha fali "Blowback" ba iha partidu rasik.

Iha tempu hanesan, ema presiza serteza politika. Infelizmente,, inserteza ida agora ne mosu tanba elite sira nia fallansu atu jere sira nia interese. Entaun la dun konvensidu atu hateten deit katak inserteza tanba numeru la naton, maibe ba povu babain, ema presiza liu tan ne'e.

No ikus liu, parte ne'ebe mak manan hosi jogu ida ne'e mak CNRT. Ho situasaun ida ne'e, CNRT konsege jere nia intensaun ho diak. Hodi kontrola komunikaun politiku ne'ebe diak, CNRT konsege hatudu duni katak sira laiha intensaun atu hadau poder. Maibe wainhira Fretilin falla ona iha negosiasaun, CNRT hein deit atu kapitaliza fallansu ida ne'e lori halibur no formaliza koligasaun ho PLP no KHUNTO. Entaun, CNRT maski lakon iha eleisaun, maibe nafatin sai hanesan forsa ne'ebe sei determina vida governu nian no karik formasaun Governu. Ho distribuisaun ne'ebe agora iha, ita bele dehan katak se mak atu determina se governu ida ne'e estavel ka lae, sei iha CNRT nia liman, se la'os iha Prezidenti CNRT nia liman.

Implikasaun

Situasaun ada agora nia implikasaun no eransa sei kontinua lori iha praktika politika no tradisaun politiku Timor nian. Saida mak akontese, no reazem publiku iha parte ida, komesa hatudu duni nivel maturidade iha nivel sosiedade nian kona ba politika. Maibe iha parte seluk, hamosu tradisaun politiku foun ba iha elite sira. Primeiru, saida mak hatudu durante ne'e, liliu iha maneira komunikaun politiku elite sira nian kontinua atu polariza sosiedade, liliu iha grupu hirak ne'ebe ativa iha politik. No fallansu iha komunikaun politik ida ne'e sei kria situasaun ida ne'ebe kontinua ho diskonfiansa ba malu entre elite sira. Ida ne'e sei susar iha futuru atu bele servisu hamutuk no kria komunikaun politiku saudavel ida entre ita nia elite politiku sira.

Impaktu ida seluk mak maneira ita halo politiku sei kontinua ho distribuisaun poder sai

importante liu doque politika publiku rasik. Saida mak lao durante ne hatudu mai ita katak ita nia politika sei kontinua nafatin ho situasaun ida iha ne'ebe ita negosia kona ba kadeira, maibe ita la negosia kona ba programa ka politika publiku. Iha tempu hanesan, konstelasaun ida agora mos halo votantes sira hasoru difikuldade bot ida oinsa atu julga partidu politiku sira bazeia ba prinsipiu, no valor iha ne'ebe kada partidu hamrik ba. Los duni katak politiku kona ba poder, no oinsa atu hetan poder. Maibe publiku mos julga partidu la'os deit kona ba susesu ka lae atu hetan poder, maibe oinsa prinsipiu no valor hirak ne'e refleta iha maneira exercisiu poder.

Konstelasaun politika ida agora mos la favorese ba autor ekonomia sira, liliu investidor bot sira ne'ebe hakarak halo investmentzu. Ne'e laos deit tanba kestaun instabilidade politika, maibe mos ho inkonsistensia partidu politiku sira nian iha konstelasaun ida ne mos refleta inserteza politika publiku (Public Policy). No kondisaun importante ida ne'ebe investidor sira presiza mak tenki iha konsistensia iha nivel politika publiku atu nune'e fasilita sira halo desizaun ba tempu naruk nian.

Implikasaun seluk mak kona ba importansia hosi eleisaun ne'e rasik ba iha prosesu formasaun governu no distribuisaun poder. Saida mak hatudu durante ne katak manan iha eleisaun la garante kona ba formasaun governu. Maibe se ita kontnua ho situasaun ida iha ne'ebe partidu ne'ebe la manan eleisaun kontinua atu sai hela deit opozisaun, pergunta ne'ebe mosu mak: oinsa tradisaun politiku ida ne'e afekta ba lejitimidade poder? Ida ne'e mos bele kria impresaun ida katak eleisaun jeral la importante. Importante liu mak negosiasaun politiku. Relativamente, ida ne'e bele reduz tia importansia hosi eleisaun hanesan mekanizmu lejitimu atu distribui poder iha sociedade laran.

No implikasaun boot liu mak ne'e. Inserteza ida ne'e sei kontinua reduz publiku nia konfiansa ba ita nia instituisaun demokratiku sira. Mundu agora enfrenta hela krize iha nivel politiku tanba sociedade sente katak instituisaun politiku sira falla ona atu refleta sira nia interese iha vida politiku. Ida ne'e nuudar alarma ida ba ita nia prosesu konstrusaun instituisaun estadu no demokrtazisaun iha ita nia rain.